

摘藻堂四庫全書薈要

集部

欽定四庫全書薈要卷二萬五百四十九

集部

明詩綜卷七十六

翰林院檢討朱彝尊編

黃端伯

五首

端伯字元公建昌新城人崇禎戊辰進士除寧波推官改杭州歷禮部郎中南京既下死于市有瑤光閣集

靜志居詩話元公近體瀏亮雖注意逃禪都無疏筍之氣絕命辭云欲識分身處刀山是道場

靈運可以
作佛矣

從軍行 二首

萬里長城北蕭條白草荒風沙吹不去秋色正茫茫日
冷行空壘天低壓戰場別來一回首何處是家鄉
遼落蕭關外陰風萬馬肥至今勞北顧何敢念東歸列
戍傳金柝寒沙卧鐵衣戰場春不到白雪作花飛

山陰道中

夙昔流觴地回溪曲曲盤遙憐沙月迴漸覺海天寬暮

色橫烟暝春陰閣雨寒自耽泉石趣無夢到長安

建德道中

青天霜氣迴匹馬立平沙遠道風千里寒城月萬家亂
山盤徑險深樹引堤斜夙昔悲秋意偏於作客賒

夜泊龍湖登仙居閣

閣夜鳴風迅江天度月寒石林幽獨到沙路暝相看倒
樹斜懸壁驚濤急下灘長懷仙境勝便欲棄儒官

徐汧 一首

汧字九一長洲人崇禎戊辰進士改庶吉士授
簡討歷贊善諭德庶子升少詹事家居投水死

三月十九日

珍饌精饒賜講筵每逢令節主恩偏十章書未陳金鑑
九逝魂猶戀細旃社稷風雲誰奏曲園林霜露已經年
龍髯回睇橋山遠玉匣珠襦不忍傳

顧咸建 一首

咸建字漢石崑山人崇禎癸未進士除錢塘知

縣死于官

詠落葉

杖策滄江思不禁
乍逢搖落一驚心
迎風野鳥當枝坐
泣雨寒蛩抱葉吟
埽徑空餘千樹曉
卷簾獨對萬峰陰
幽居一夜聽蕭瑟
片片隨流不到林

陸培一首

培字鯤庭仁和人
崇禎庚辰進士
除行人家居

死難

詩話行人風概自持卒蹈相隲之節曩與陳公
朱明以大社不相能行人既就義陳公亦赴越
江以死曰吾生何面目見鯤庭
於地下今兩公並祀忠烈祠

絕命詩

誰謂朝廷一命輕行人使節本皇明春秋官叙諸侯上
周禮班從司馬名雍國尚慙收采石荆胥無計泣秦兵
蕩陰徒有前衣血烈帝孤臣恨未平

祁彪佳

一首

彪佳字幼文紹興山陰人天啓壬戌進士除興

化府推官選授福建道御史巡按蘇松改南京
畿道以大理寺丞轉巡撫應天都御史謝病歸
乙酉閏月自投寓園池中死

詩話祁公美風采夫人商亦有令儀閨門唱隨
鄉黨有金童玉女之目其司理莆陽也慮閩人
語近侏離預遣人潛往買二鹿婢詢其鄉音及
升廳事胥吏多操土語侮公公佯不知浹旬後
按籍遍召在官人至一一聲其罪衆驚以為神
迨入為臺諫即進封事略云凡文武內外大小
諸臣必使之安其位而後各盡其心邇來六卿
九列之長詰責時聞引罪日見因而周章急遽
救過不遑竊恐當事諸臣悚於嚴旨冀以迎合
揣摩善保名位臣所慮於大臣者此也人材中

下參半藉上感發其忠義鼓舞以功名今司道
有司或欽案之累由人或錢穀之輸未足降級
住俸什居二三必至苟且支吾急功赴名之心
不勝其掩罪匿瑕之念臣所慮於羣臣者此也
陛下聞鼓輦而思將帥之臣儻得真英雄即推
穀設壇夫豈為過一或獎拔之術未盡則冒濫
之實將萌臣所慮於武臣者此也陛下深懲情
竄特遣內臣撫按之事多令監視正恐同罪同
功反使互蒙互蔽開水火之端其患顯啓交結
之漸其患深臣所慮於內臣者此也其言切中
思陵時弊故其後亡國卒由此數端云公嘗治
別業于嵩山極林壑之勝乙酉閏月六日坐園
中題其案曰圖功為其難潔身為其易吾為其
易者聊存潔身志含笑入九泉浩然留天地又
書曰已治棺寄戴山戒珠寺可取以飲我是夜
兄子鴻孫侍側夜分不寐公第曰君子之愛人

也以德逮鴻孫德隱几步至放生碣下投水昧
坦猶整巾帶立水中子理孫班孫葬之園菊舍
池館為寺塑公像
于堂至今存焉

豐莊

為愛農家樂莊居築園場秧鉞霑雨足稻子過風香北
郭依桑樹東臯接藕塘主人多種秫春酒足壺觴

劉宗周

二首

宗周字啓東紹興山陰人萬曆辛丑進士授行
人遷禮部主事歷光祿寺丞尚寶少卿太僕少

卿引疾歸尋補右通政削籍起順天府尹再引
疾歸起工部左侍郎以左都御史掌都察院事
乙酉六月不食死有戢山詩集

詩話先生家居恒服紫花布衣士大夫爭效之
布為長價吳江趙士諤知會稽縣事嘗問先生
疾造榻前出而歎曰宜意今日得覩管幼安萬
厯丁巳京察議及先生士諤時為考功郎爭曰
劉大行之清修人所不堪此士諤之所親見者
乃止吾鄉吳太常磊齋於天啓壬戌登第之前
夢一隱者誦文信國山河破碎風漂絮身世浮
沉雨打萍之句問其姓名曰劉宗周也太常不
省時念臺先生以儀曹郎知貢舉相見驚訝其
後交契靡間甲申之變太常死之逾年先生里

居絕粒旬有四日而終遺詩云信國不可為偷
生豈能久予嘗造先生廬堂不過十笏京兆干
旌尚存思陵曾賜勅云蔬食菜羹三月不知肉
味敝車羸馬廿年猶是書生先生當之信可無
作

出通州用友人韻

策蹇何所之遭時亦云厄一步一回首四郊營壘迫大
道宜如矢青天萬古闢從此遂已而身後令人惜

酬別長安故人

弱柳千章鎖鳳樓春風送客不勝愁杜門重憶十年病

東髮誰先天下憂銷鑠壯心吾自老傍徨歧路子何求
却教空谷傳驪唱落日浮雲滿帝州

溫璜一首

璜初名以介字于石烏程人崇禎癸未進士除
徽州府推官乙酉六月死于官有貞石堂集

詩話溫公少孤母陸孺人鞠之破屋一間無帷
帳姑沈病且餓同坐卧一板箱種火煨粥以為
食教其子讀書姑卒孺人哀毀如子天啓七年
公請于有司聞于朝詔旌其節孝又一十八年
而公成進士年六十矣司李徽州聞國難恒引
佩刀歎曰此身當付汝及城破先殺其女寶德

次殺妻茅妻女皆延頸就死乃自刎公初名以
介注名復社第一集不以兄在相位見擯于清
流後禱夢於子忠肅祠夢忠肅語之云子不當
名以介宜更曰璜遂更焉陸孺人著有家訓行
世於

寄友

靈隱峰前手暫攜
千章新綠子規啼
眼邊流水春重到
別後停雲思幾迷
俯聽露珠傳點畫
驚聞藥裏急刀圭
殷勤簡付遺方法
茹澹安緣緩杖藜

左懋第一首

懋第字仲及萊陽人宗禎卒未進士除澄城知縣選授戶科給事中歷刑禮兵三科升太常少卿巡撫都御史以兵部右侍郎兼都御史督師河北充通問使不屈誅

詩話左公將北行貽書姜給事琛大略謂國遭大故二東不聞有斷頭穴胸以報故君者彼鄒魯仁義之稱安在懋第此行是懋第死日也既入燕卒以閏月十九日死于市新城王尚書士禎池北偶談云公母徐寧海儒家女甲申京城陷從子懋泰載以歸行至白溝河仰天歎曰嗚呼此張叔夜絕吭處也呼懋泰前責以不能死國且曰吾婦人身受國恩不能草間偷活寄語

懋第勉之勿以我為念言訖而死蓋出都
不食已數日矣是母是子前史亦不多見

道上

歸鴻昨夜過紅葉見秋深念我籬邊菊思君石上琴舍
車眺水色倚樹聽風音舊業荒東海悠悠此際心

徐石麒

十五首

石麒字寶摩青浦籍嘉興人天啓壬戌進士除
工部主事削籍崇禎初起補南禮部尋改吏部
升南尚寶卿應天府丞歷吏部尚書有可經堂

集

詩話冢宰歸田之日築堂于郡樹曰可經人不
解其故及乙酉城被圍公度必不能守步自東
門入城破自經于堂始信公之就義立志已久
蓋與昔賢止水之意昭合焉公古今詩俱新警
不作規撫蹈襲之語鍾嶸詩品
以落花依草喻丘遲公實似之

贈同鄉朱六符

予本同圃蒿飄在天一端咫尺粉與梓邈若霄漢間翔
鳥憩前林猛虎戀故山傷茲遠游客中夜積悲歎忽遇
故鄉友驚喜相盤桓把臂問舊事耆舊半摧殘憂根長

愁條淚下如奔湍樽酒非不旨安能起沉歡幸君到故園為我傳平安

憩古墓作

郊游無名山荒丘且踏屣古木既叢叢豐草亦靡靡隔葉隱幽禽清音啼不已石馬被文韉翁仲夾而侍不能驅牛羊朝暮齧其址此中陳死人井樽安足恃所以楊王孫裸身無乃是

送錢車駕左遷歸里

依依鍾山雲坦坦石城道驅車出龍關送我昔所好舟
子且停橈聽我歌草草巧仕有別才置身青雲表夫子
天下士紉佩祇蘭藻忽失上官意飛章注下考粲粲當
塗子片言由意造散宜策獻姝季路曾請禱奈何堅弗
應深文任顛倒平生久要者棄置迹如埽豈曰無蹇修
洵美非吾寶長嘯歸去來形容豈枯槁君家錫山下門
迎鬱蘿薦雲乳發冽泉雪花散香稻潔白飡高堂此樂
詎可討臨別重躊躇申言豁懷抱

謝劉太史湛陸惠詩

予曾過大梁臨風懷伊摯秉耒耕莘疇遽抱唐虞志一
民不時雍內溝發深思此道久已陳夫子願躬試文行
動至尊頭龍親簡置既窮太乙奇復發鴻寶祕早晚宜
相麻天下乃得治麒也嵒窳人所受盈其器承乏白雲
省爰書失聖意投荒分所宜而况僅播棄譬如累碁者
累高勢自墜烽火滿近郊逐臣正遷次感君懷芍藥題
扇以相遺奄然蓬蒿人儼若佩華璫此情何可酬此念

何可寘頓令松柏心白首欲自刺

臨鏡

攬鏡照病顏不知鏡裏誰似鬼有微息似人無雙頤似
客貌何似是我何其羸展轉不能視掩鏡還自悲頭顱
今如此百年寧所期安仁三十二玄鬢已成絲而況三
十三於潘更長之江南多早衰昔人已如茲假令彭與
錢臨歿等殤兒夭壽何足異尻輪惟所宜昔人有明訓
樂天復奚疑

苦寒行在句曲道上

天寒敝絮僵如鐵，車輪乍轉車聲咽。
歷過千山萬山雲，時飄三點五點雪。
皮膚蜩縮毛髮張，蹇驢蹄滑愁道長。
暮烟一點青句曲，鞭梢遙指此中宿。

明月行懷王大基生

今年月是去年月，去年人作今年別。
去年對月兩相將，今年對月腸斷絕。
腸斷絕兮起徬徨，中庭重露如凝霜。
綠錢盈階時草芳，紫予懷兮不能忘。
丈夫骭髀寧有淚。

已覺簌簌沾衣裳歲如馳兮不我與望美人兮天一方
仰天歌兮夜將旦明月黯黯兮沉垂楊

曉發新州

江抱新州碧沙仍舊日黃難期晴雨色莫辨水雲光逆
旅便風俗征人漸老蒼平生我任達久矣破行藏

次團江

下馬團風許烏林舊戰場楚弓沙月白吳壘戍雲黃鑑
影涵天遠襟流東地長江聲疑有恨如欲訴興亡

黃州晚泊

赤壁雲初暝，烏林日漸紅。
波搖兩岸火，人語隔江風。
夢鶴捎天路，然犀逼水宮。
天寒游子意，清夜月明中。

望匡廬

突兀此何處，匡君廬亘天。
黛浮五老壁，青入九江船。
慧遠林中寺，康王谷口泉。
苻生今已老，誰與買山錢。

過安慶

百戰舒州地，英雄久寂寥。
潯陽懸暮色，滄海落歸潮。
楚

竹然魚子汀蘆宿鴈寮金陵行且近不斷瑞烟飄

池口有懷

黃鶴池邊鶴金雞石上雞乘雲千載去落月幾回啼不
見仙人跡空傳過客題蕭條暮江上腸斷楚天低

次蕪湖

倚櫂鳩茲邑山光雜水氛估樵蟠郭遠市語隔江聞烟
氣凝為霧歌風散入雲古來佳麗地無日不紛紛

夜發靜海抵直沽

木黍高低弄夕曛
檣燈零亂破黃昏
樹蒸夜氣三分雨
帆裏秋烟一葉雲
靜海金鉦鳴古戍
直沽牙間駐新軍
援遼已竭東南力
何日辰韓報策勛

張翊一首

翊字叔韓秀水縣學生
城破整巾欄南向正席
坐兵以刃臨之罵不已
遂遇害

鶴夢

百禽正嘈雜
此鶴獨孤眠
奮翮豈無俟
藏神亦偶然
庭

中人寂寂松下月娟娟知入寥天去緱山何處邊

項嘉謨一首

嘉謨字向彤一字君禹秀水人有讀選堂詞賦

集

譚梁生云向彤阮仲容謝幼輿一流詩篇都雅簡勝

詩話向彤投筆遠游渡河出塞尋入閩登武
曹能始錄其詩入十二代詩選乙酉閏六月城
破束平生所著詩賦于懷投天星湖死子翼妾
張從焉向彤墨林之孫賦性儻蕩不羈中歲產
落歲辛巳年飢糴絕從父以五斗米貽之妾張
為執爨知向彤不甘澹泊以二升米易乾魚進
飯向彤怒曰乾魚豈可下箸邪復以米三升易
炙雞乃飯予家與向彤鄰竈婦述之以為笑謂

是韋履子弟栗果少年
而視死如歸可敬也已

晚次鄉溪

人家遠見女牆頭客到城邊盡繫舟
薄暮寒蟬聲未歇
心隨楊柳送殘秋

錢應金

三首

應金字而介一字仙上嘉興縣學生城破走村
居游兵於郊野見其行異於衆遂見殺有古處

堂集

詩話而介雅以詩詞
名而今存者無幾

此閣贈周幼文

謾謾山上松磊磊澗中石託根非不深所貴在貞白白
華志養親陟屺怨行役懷古徒悠悠瞻母時脈脈綺疏
闌南楹抗言恣墳索曲鍼不受磁腐草不受珀永霜歲
云晏至理在琴冊

沈甫受蝶花居秋色詩

沈郎八詠世爭誇草色庭中不讓花秋氣逼人清入夢

夢騎蝴蝶到君家

邗溝

烟荒月淡古邗溝
淮水遙連江水流
六代繁華餘腐草
至今螢火照揚州

侯峒曾

二首

峒曾字豫瞻蘇州嘉定人天啓乙丑進士除南
兵部主事調吏部歷郎中出為江西提學副使
轉廣東右參政調嘉湖道升順天府丞歷左通

政使乙酉秋縣城破赴水死

詩話萊陽宋公繼登備兵嘉湖夜有白猿竊其
衣冠服之搥鼓升廳事時海寧袁秀才祿留公
幕中猿入卧室披其帷秀才大慙公命隸卒環
守而猿之往來如故也予童子日偕諸昆弟行
精嚴寺街人爭聚觀謂猿方坐鍾樓啖果予審
視獨未之覩其後納言至止猿乃潛蹤又常熟
時敏知海寧縣事夜草爰書有女子侍側磨墨
問從何來曰鬼也敏既摧給事中代之者侯官
林塗鬼自是不復至侯公林令俱
忠臣以此知邪不勝正理有然者

晚行餘杭山中

解鞍一散步羣峰亂將夕浮嵐羃遙青喬柯拂深碧須

史落霞散銀紫紛狼籍尋蹊得絕澗驚深互歎射有如
翠蛟舞飛下三千尺一步一回顧已覺耳目易此景宜
急追一失難再獲

送表弟楊維斗解元上公車

赴隴徵書有曠恩仍偕計吏謁金門時危漸覺科名薄
道在還知禮樂尊老子甲兵今孰仗嗣宗臧否不輕論
冰霜歲晚孤征夜襖被應知手綫溫

侯玄演

二首

玄演字幾道通政峒曾子

雜詩

道喪向千載
百家日浸淫
如彼鍾磬歌
逐響遺其音
元宰何微茫
悠悠費追尋
世皆尚彫飾
未敢明此心
微言會將絕
太息空撫襟

和新柳詞

秦淮雪凇緩
春晴十里烟
堤綠未明早
是酒旗歌板地
隔江風浪卷
蕪城

侯玄潔

二首

玄潔字雲俱亦通政峒曾子

癸未九日寓崑山

肺病經三月秋深寄古祠近山寒更早多雨菊翻遲漸
減文章樂能忘寇盜悲今朝無客至今節竟誰知

示智舍

天王十五年來事孤客三千里外人望闕尚留年少哭
哀時偏見異鄉春坐愁南郡征輸日行過江黃戰伐塵

觸目大荒空草木春風生事又黃巾

黃淳耀 十二首

淳耀初名金耀字蘊生蘇州嘉定人崇禎癸未進士乙酉家居城破自縊有陶菴詩集

詩話陶菴精於書義融會九經諸史審擇而出之當崇禎之季方以駢麗相尚不知者以為陳言予叔父芾園先生獨賞心擊節盡以其橐授予讀之久之而漸有稱焉者如雅頌得所樂有堂上堂下之分又孔子未嘗刪詩伯鯨未嘗誅死皆至當之論乃邇來選家以其未盡合乎朱子之集注章句痛加塗抹是何異於下士之聞道乎詩亦堅厚無懦響由不惑於楚人之咻然

也

和陶飲酒

朝光入山樓，棲鳥已驚喧。
攬裘暴新陽，暖氣無頗偏。
仰視天宇清，得我檐前山。
山中出岫雲，變滅何時還。
我心正惆悵，默與風鈴言。

和癸卯歲始春

舊穀滿場圃，知子良非貧。
糟牀注春醪，酬汝四體勤。
開軒一笑粲，莫適為主人。
薜蘿花乳香，鱸縷銀絲新。
咄嗟

行酒炙童僕皆欣欣中原有格鬪行子勞問津不能濟
時代甘與農圃隣逝辭謝景夷來就劉遺民

和乙巳歲三月

西崦有佳花首春烟霧積良游阻塵鞅耿耿懷在昔野
寺流晨鐘雲林矯風翮湖山光皎鏡千里如不隔之子
天機深平吟謝形役一持金石韻如與清賞易幽悰方
悵劬况復暫離析寄言山中人參取庭前柏

和歸田園居

家無環堵宮所至思買山何異俟河清人壽期千年安
得如古人采山復臨淵敬受十賚文賚以北阪田巖樓
高百層老屋餘三間湖江流東西竹木榮後前中央置
講堂文史浩如烟歌風復蹈雅樂志忘華顛此意恐蹉
跎飛光去間門畫餅不可食詆諧聊復然

和擬古

三首

亭亭采桑女清光映城隅羅衣出纖手皎若春萸舒芳
風何飄飄薄暮歸重廬行子皆歎息願言與之居空簾

隔星漢白露委靡蕪淵意不可道蹇修定何如

步上姑胥臺悲風來大荒古墳何嵯嶢下有黃金堂寶
衣化寒灰月露浩茫茫前朝割據時復作繁華場侯王
及廝役聚斂歸北邙感此拔劍舞青山為低昂秉燭方
視夜歎忽明東方我非好名人亦起羊公傷

弱年見承平自謂長如茲一從更事來世已非前時雕
虎橫井陘黃流混澠溜杖劍出門去行行復狐疑路逢
李主簿問彼龜策辭龜策不我告龜勉自研思仁義心

所安皇天吾不欺瀉水置平地東西任所之撫琴操倚
蘭亂之以侑詩

野人

二首

野人歎息年歲惡池中掘井井底涸飛蝗引子來蔽天
辛苦將身事田作朝廷加派時時有哭訴官司但揺手
歸逢吏胥狹路邊軟裘快馬行索錢

野人歎息朝無人朝中朋黨如魚鱗十官名對九官默
篋中腰下皆黃銀不知何人理陰陽頻年日食四海荒

我欲上書詆朝士又恐人呼妄男子

虞山喫虎肉作

猛虎入山山氣惡腥風倒射巖石落兩三邨
邨不識虎謂是旄牛未生角扼虎之吭擘虎尾
虎驚不及施牙觜東海無煩赤刀制南山已報
白額死老夫羈旅春盤空短衣匹馬行山中坐
分羹臠飽欲死拔劍四顧吾何功邨邨莫倉卒
儒冠為爾頻衝髮人間真有猛於虎勸爾拔身
辭虎窟

次韻酬別張子石

百丈牽江一線平，勞君客裏念歸程。
即看去住誰能料，可是分離莫漫輕。
白鳥背飛星子驛，朱旗遙颭石頭城。
船牕日把詩篇坐，香草含風處處生。

張貞白有離世之志，作別廬舍詩見示，余反其意留之。

瓜廬小結在塘坳，城市翛然即遠郊。
谷為愚公寧避辱，亭因揚子不辭嘲。
鳴蜩秋盡猶緣砌，舞燕春深亦認巢。

莫愛雲松樓絕壁山中依舊要誅茅

龔用圓 一首

用圓字智淵蘇州嘉定人天啓辛酉舉人嘉興

儒學教諭

侯雍瞻云先生司鐸嘉禾先伯兄方應備兵之命俾攝郡司馬事寇盜屏

息迨聞南都不守挂冠歸里城破兄弟赴水家人入城蹤跡之於大柳樹下有二尸相抱持其一肘間懷印則先生兄弟也邈哉先生千古為烈矣
顧端本云 嚶城既破龔博士智淵與兄用廣弟用厚猶子元韶元朋元增及閨闕殉節者五人先生苦心學殖篇章頗富惜散佚不傳

湖上遇同年朱子暇

一見相攜話舊遊湖光汎汎斷橋頭寒烟迷却西泠路
還向當壚問酒樓

馬元調一首

元調字巽父上海儒學生僑居嘉定人稱簡堂
先生

從師遊棲霞寺

吾昔遊棲霞同人催北渡未識山中僧那辨山下路巖
澗迷東西欲記恒失誤先生理舊游小子愜所慕

黃毓祺 二首

毓祺字介子江陰學生有大愚老人遺集

画竹引贈朱白民

長風從天來吹我魂飛飛飛上謁天帝扉天帝問我
何所欲不願為人願為竹帝笑黃生無乃太癡竹有何
好而爾願之我不願截為竿大魚小魚慘不歡我不願
截為杖化龍君山之湖上我不願截為簫鳳兮鳳兮不
可招我亦不願娥皇女英哀哀攀我泣重瞳馭遙叫不

得朱白民朱白民願伊為我一寫真貌我形似魚精神
所以願為竹不願復為人

不寐憶元兄南行

暗風吹雨夜蕭森布被繩牀冷不禁老別匪徒三日惡
淡交奚止十年深案頭飢鼠縱橫出階下寒蛩斷續吟
遙憶孤舟蘆荻岸有誰同我此時心

夏允彞 二首

允彞字彞仲號瑗公嘉善籍松江華亭人崇禎

丁丑進士除長樂知縣以吏部行取補考功主事旋歸里乙酉南京下自投池水死

詩話幾社六子瑗公以經義見長詩非專尚然其撰長樂志境有孝子節婦必賦詩以旌之集中樂府未嘗不合古人也野史述瑗公授命在乙酉五月第集有練川五哀詩按練川城潰乃是年七月五日瑗公尚存則止水之投當是松江失守之日爾

襄陽踏銅鞮

辛苦襄陽女織縑還織素縑成身上衣素作風帆布

黃進士淳耀哀詩

黃子不偶生大雅寡諧俗羽儀乍高翥結綬匪所欲黃
雲暗蒼梧北風號大陸烽火滿吳關下邑勢彌蹙緬彼
二三子登陴自躑躅城郢既已乖號秦又誰告處死良
獨難苟生何能淑吁嗟烈士心伯仲互相勗威鳳既在
羅恥與凡禽逐未知沒者悲但見存者辱存沒兩茫茫
思君不可贖

睦明永

一首

明永字嵩年丹陽人崇禎壬午舉人選授華亭

儒學教諭乙酉八月三日松江城破自經不死
投泮水被執不屈見殺有世經堂橐

臨江觀古意

即今懷
閨樓

煬帝飛樓屈紫霄檻拍長江接海潮三十殿脚南巡汴
百萬舟師東下遼晉陽戈甲從天起仁壽宮中泉作醴
檻外楊花依舊飛千里桑田隔江水

顧咸受

一首

咸受字幼疏崑山人天啓甲子舉人縣城破死

于難

落葉

天半淒清鴈字斜
箇人無賴小牕紗
三分秋色三分雨
半似霜容半似花
忽送離愁迷曲徑
暗隨幽夢度平沙
無情最是堪腸斷
不為蕭條惜物華

梁于溪

一首

于溪字飲光江都人
崇禎癸未進士除萬安知

縣陣沒

竹西亭

茱萸灣水渙渙上有孤亭峙高岸而今冷落荒烟斷遊
人不來蒼鼠竄問竹西人不辨惟有隴上舊耕夫五十
年前說曾見

麻三衡 二首

三衡字孟璿宣城人選貢生屯師姑山兵潰被
執死于市

詩話孟璿注名復社遽賦無衣陳安未克生還
狼睫已得死所詩如落日照荒野亡猿懷故林

魂銷分鈿日心折覆巢時草閣新寒入江郊落
鴈多一身去鄉土雙淚滿滄洲吳兒望歲唯呼
雨楚客憂生盡憶家夢回塞上雙流淚家在淮
南獨倚樓萬山茅屋白雲滿十里句溪紅葉飛
殊自超
超朗朗

贈錢聖月

不寐成搔首蕭然獨寤歌霜天砧響急庭樹雨聲多酒
力三更緩愁心萬緒過錢郎戀明主獻賦意如何

春興

二月新雨歇春流始到門叢筠連晝暝新燕掠波翻山

靜鹿無迹林香風滿園中原多轉戰幾處欲招魂

沈壽堯
一首

壽堯字景山宣城縣學生死于難

即事

幽棲如久客日暮起啼鳥橘實寒猶在梅花凍欲無聞
鐘山寺遠聽雪夜燈孤賴有牀頭酒長吟可不沽

王養正
一首

養正字聖功泗州人崇禎戊辰進士除海鹽知

縣以憂歸補秀水謫河南按察司簡較升襄陽
推官入為刑部主事歷員外郎出知南康府遷
江西按察副使建昌既下繫至武昌死之有漫
吟等集

對菊

仙人授錦囊中有百年草本是駐顏丹人間不知寶

金聲 一首

聲字子駿嘉魚籍休寧人崇禎戊辰進士改庶

吉士以山東道御史參軍務升山東按察僉事
復起修撰有集

送雲莊師至吳門

斯文未墜地夫子獨栖遲論易真傳在從先與俗移片
雲常自遠孤鶴去何之別後時相憶雲山不可知

吳應箕

六首

應箕字次尾貴池人縣學生乙酉死于難有樓

山堂前後集

詩話先生羅九經二十一史于胸中洞悉古今興亡順逆之迹當崇禎中預慮燕都之必不能守聞者皆笑其迂而先生持論侃侃不阿也名雖不登朝籍而人材之邪正國事之得失瞭如指掌撰有熹朝忠節傳二卷兩朝剝復錄十卷留都見聞錄三卷東林本末六卷續觚不觚錄二卷其書或傳或不傳覽者可以當龜鑑矣分宜張爾公稱先生人文似陳同甫是誠知言聞先生授命處血迹至今猶存洗之不去甚弘嵇紹而後不多得也

歡聞曲

歡欲聞儂歌儂意忽不樂寧使歌未終不忍歡淚落

練鄉勇

舊營非無兵府亦役健壯何如更選士不戰使敵創我
聞逐賊師老弱匱轉餉馳騁梁楚交賊來不敢抗過掠
虐貧民氣驕陵主將官兵終驛騷鄉勇新跌宕古人驅
市人披靡隨所向今匪素拊搢信以死長上里胥日催
督閭閻相耀誑兵怒不可邇塗膏飭資仗區區賦幾何
歲亦五千兩

悼吳門文相國

相國信公喬大庭遭遇同金閨十五載凜冽標清風一

朝邁爰立身通道反窮時方工謠詠安能久置公去國
懷明聖憂心日忡忡黯淡吳閭邑淒涼象緯中斯人不
可作世已摧華嵩

何以

何以使兵消莫如加派輟何以使賊平莫如官兵撤不
見十年來請兵日不絕兵多賊亦多未見一賊滅賊去
兵肆掠賊來兵不截撫軍飭啞聾鎮帥類蹙躅塘報習
為欺上下徒牽掣終年庚癸呼竭盡民膏血我皇至神

武羣臣亦憂愒事勢久凌遲相戒有卷舌雖我懷區區
天遠何能說

蘇州行

鱗諸要離死已久墓旁宿草蕪衰柳斯民三代直道存
肯使端人舁虎口諸生大哭軍門前百姓呼號奮徒手
須臾緹騎鳥獸奔天子之詔吾何有爾時官長汗浹背
縲臣夜半單舸走民間訛言屠一城聖人憫亂殲渠首
嗚呼天下幾蘇州藁葬五人名不朽

耕田苦

耕田苦耕田苦插秧三月今無雨吳中水利半人工十
里九見翻車舞一車灌田畝二三一車用力人六五水
田高下不相及置車銜接凡數部盡日戽水水盈寸南
風復吹作乾土戮力安知晝還夜赤體相對子與父下
濕上炎背欲裂前呼後和聲邪許東南歲輸四百萬那
知粒粒出脛股桔槔幸有古人師不然滿原成薄鹵嗚
呼耕田之苦難比數有苦不聞動官府中原鉏耰化為

兵下邑催徵尚如虎

胡甲桂 一首

甲桂字秋卿崑山人崇禎己卯副榜除南昌通判遷永州同知以道梗未赴改廣信城破被執不屈幽之別所自經死

夜泊常山

淙淙灘響上舟遲到面山容未即移更喜月明迎短櫂
吳吟細聽隔船詞

祝淵二首

淵字開美海寧人崇禎癸酉舉人有月隱先生

遺藁

詩話崇禎壬午先生伏闕申救劉公宗周時未
識劉公也及公罷歸始著錄稱弟子附舟南還
已而綴騎逮入詔獄寇逼京師有詔赦出者城
陷太常卿吳公麟徵殉之先生視含殮護其喪
歸途遇吳吉士爾璜斷一指寄其家先生為攜
歸留都既下先生葬其母尋自經死會劉公絕
粒公弟子王毓著自投柳橋下遺書于公謂慎
無為王炎午所笑師弟之死蓋不出三旬也

西湖月夜

二首

落月鱗鱗水面浮
露華濃滴桂叢秋
不知何處鳴柔櫓
驚起一雙雪色鷗

佛火漁燈漸寂寥
推篷起坐已中宵
夜來極浦灘聲急
知入西泠第幾橋

李待問

一首

待問字存我松江華亭人
崇禎癸未進士乙酉
八月保松江城中流矢死


卧子招飲卧龍山蓬萊閣

故人留牘少酒坐亦從容俯視湖一曲不知花幾重澄
煙天鏡水哀壑禹陵松身在蓬萊閣千巖第一峰

明詩綜卷七十六

謹案卷七十五第十七頁前三行台哈布哈舊作
泰不華今改 二十四頁後八行突何應作托
郭但入詩音韻不協姑仍其舊 二十五頁前一
行角斯囉應作宜勒斯賚但入詩音韻不協姑
仍其舊





總校官庶吉士 臣 張能照

校對官檢討 臣 蕭九成

謄錄監生 臣 周元

欽定四庫全書薈要

集部

明詩綜卷七十八

詳校官編修臣汪鏞



欽定四庫全書薈要卷二萬五百五十

集部

明詩綜卷七十七

翰林院檢討朱彝尊編

黃道周

一首

道周字幼玄一字螭若漳州鎮海衛人天啓壬戌進士改庶吉士授編修歷中允以言事鐫級俄落職尋起官以諭德掌司經局再遷少詹事協理府事與經筵講隨謫江西布政司都事逮

至京廷杖下詔獄遣戍福藩稱制進禮部尚書
南京既下猶督師出發源師潰執繫故尚膳監
不屈丙戌二月死于市有大滌函書浩然咏

靜志居詩話詞臣無言責居无咎无譽之地需
次待遷而已迨石齋先生入翰苑與上虞同年
倪文貞公俱自任天下之重崇正去邪盡忠補
過引裾折檻九死不同先生詩所云親從霹靂
推車過又得滂沱自在春蓋實錄也及退而講
學於杭則大滌洞天於閩則蓬萊峽少長咸集
遐邇具來監史主賓琴瑟鐘磬庶幾漁雉之遺
風焉先生璣象之學辭義深奧後生或昧其指
歸詩才亦未免蹇駸要其光燄不啻萬丈也曲
周路皓月過銅山弔先生詩云道德公自重文

章公自深若夫軍旅事似非公所
任用違其才此百世所惋惜者

西湖忠烈祠迎送神曲

雷鼓闐兮龍在野雲離披兮龍血下龍上天兮星無光
椒糈餉兮蘭不芳靈之集兮四國鴻八蹄兮麟九翼凌
滄海兮拍白日蹙徂征兮何不得息歸休兮此堂水周
兮中央寒雞道兮菖蒲羅百珍兮瓊漿驂素虯兮駢文
鸞柅靈車兮繫靈馬執靈祛兮淚盈把珮琚兮灑灑晝
不足兮宜宵夜維舟兮鏤筵新夫君兮王正年靈參差

分無後先澹眉鬢分馭青天靈何為分中悁悁

袁繼咸 二首

繼咸字季通宜春人天啓乙丑進士除行人選
授廣東道御史謫行人司副升禮部主事由員
外郎出為按察僉事累官兵部右侍郎兼副都

御史總督九江軍務有六柳堂遺集

張爾公云
臨侯曾祖

魯訓中成化丙戌進士年四十退隱不仕慕陶
靖節自稱六柳居士此臨侯以此名其集也
詩話侍郎處危疑之際內抑權姦外調重鎮備
極苦心晚授命於燕京堪與左仲及比烈若江

州之焚倉猝不能戢將士當非其本心近見野
紀有誣公歸命本朝者殆出怨家之口也軍
中自銘曰死事也易成事也難為嬰弗克為曰
維艱張死匪先許死匪後臣心靡他靖獻我后
嗚呼父母有過則諫諫而不從則號泣是天授
之不怨晉陽之甲豈可訓哉既被獲抵大勝關
親王傳語袁總督著隨行與以大官做又自銘
曰大官好做大節難移成仁取義前訓是依文
山袁山仰止庶幾
袁山侍郎自號也

讀謝皋羽西臺慟哭記

南山有朱鳥飛中虞人弦飼以金精粒對之不下咽粒
味豈不旨不如南土泉黃冠志弗遂碧血流濺濺有客

感意氣慟哭西臺顛擊碎鐵如意悲響震嚴川歸舟不
成寐髣髴語燈前嗟彼積翁羅我非雀與鳶夢炎何足
刺知己殊未然周粟不可茹箕疇曾未傳生死良非苟
忠孝各自全謝子幽明契聊以祕懷宣言罷倏不見月
明高在天

至日感懷

葭灰吹律動長安猶記衣冠拜紫鑾此日近臣新寵澤
貂裘駿馬不知寒

吳易九首

易字日生吳江人崇禎癸未進士有東湖唱和

集

詩話啓禎之間風雅凌替古風尤置不講日生奮跡松陵誦六公詠原本杜老八哀之作是時第知卧子有起衰之功然卧子豐縉日生戊削各有其長

六公詠

靖遠侯王忠毅公驥

抱膝當時危懷古存匡濟英雄與世徂風烈忍衰替我

思靖遠公振翮全盛世踴躍弓馬間談笑布軍勢甘涼
始出鎮肅整戎伍氣張筵斬懦將股栗衆相視一舉平
阿台河西晏亭燧麓川肆作逆公又決大計鎖甲金兜
牟照耀宮中賜長驅展方略奪險扼吭背指麾風霆奔
戰象失精銳萬古金沙江不聞漢兵至江枯石碣爛羅
拜帳下誓凱歌萬里入勞使千里出不有爪牙臣何以
正神器龍蛇壯士節蛙龜腐儒議嗚呼三征南丹書在
苗裔

威寧伯王襄敏公越

威寧熊羆姿高視氣敵萬脫略繩墨外勇智走飛電大
廷吐奇言排閭怒風旋威聲動異域瓌特震所見目屬
膺帝心短袂故上殿帝曰快御史為朕將而弁所部皆
鷹騰公也身搏戰擣虛握勝策入穴虎乃困一炬紅鹽
池冰天千帳燭烽銷玉關烟雪卷陰山片轅門正高會
琵琶奏哀豔戰士挾秦姝頓使死力賤豁達籠豪英出
沒神鬼眩丈夫重勲名志豈在鐵券絕塞縣孤臣中援

何足玷慘淡黃金印零落白羽扇風塵暗不開北顧撫
長劍

新建侯王文成公守仁

文成王佐才星嶽氣突兀資神道無餘童穉挺英越訪
客絕塞游獷騎角馳射睥睨山川勢志蓋燕然磧縱橫
五十家既長稍折節空濛九華雲浩蕩南屏月以茲洞
儒宗奧義大闡斥精微續聖系餘緒贊帝業運籌羣盜
間飈焱百巢滅神龍無安翔金翅縱高掣逆旗蔽西江

妖星射金闕公時擁上流安危視縣髮隻手提天網雷
轟走飛檄指顧縛元凶九廟初安帖煌煌再造勛不得
身獻捷帝閣紛狼狐八荒置牙孽非公輝威名乾坤免
頽疊控制仗兵符中樞洵雄哲吁嗟營青蠅功大賞故
阨論道羅豪賢恬澹謝矜伐崩迫戎馬際講席每不輟
中興劇南顧元老再秉鉞六字蛟螭薶千年銅柱坼漢
儀耀百蠻灑淚思田碣威寧赫遺劒伏波愾廟謁乃知
非常人洞達神爽接我生世未遠恐懼壯猷歆靖竟

何人中原日流血

定襄侯郭忠武公登

郭公武定孫神駒渥洼好十齡走健筆歛吸振奇藻動
徹春秋義兵法腹笥了安危異人出所以奠皇造英宗
北狩初決機一何早黃塵擁翠蓋痛憤居庸道紫微為
盪搖柱極西欲倒我公奮孤撐乃心協少保國也今有
君揮血視清昊截竄雲中城虎豹鬱相抱崩騰萬馬陣
擊衆每用少猿臂捷有神鐵甲盡穿縞楊石雄軍聲鎖

鑄資電埽撇烈天網翻槎材地龍繞豈多三軍力遂爭
造化巧詩看橫梁賦檄倚馬上草排宕非常姿灝氣秋
空晶高詠戰場篇寂寞風流紹

少保戚公繼光

大將東南誰戚公真鷹揚雄情恣押闔祕策揮陰陽夙
奉綦履訓更見經術詳結友傾賢豪文采殊頡頏曉達
三門流以律師所臧龍鳥追武侯衡軸通軒皇變化開
精心什伍為鴛鴦島夷蹂南土兵氣慘不張閉營百日

練戰力虎士強疾埽溟波平受鉞總薊方計伸犁庭威
十萬環偏廂遠猷振華夏定策為周防亭障雜星羅旌
旄蔽日先呼韓遂稽首郅支亦來王款關四十年戎馬
不敢颺伐暴貴上兵功豈必戰場竟無通侯賞坐使壯
士傷時平武略絀世亂智勇長問彼登壇者曷以恢我
疆

都督俞公大猷

文武道不殊自古惜灌絳俞公萬夫雄侔儻亦儒將讀

書當陽亞雅歌征鹵上開豁延攬真沉靜韜鈴暢公師
趙布衣手畫風雲狀貫穿十八勢方圓識所舛瑣瑣部
使者叱咤故庸妄寇憑舟山劇策恃橫海壯洪飈排烈
風壯氣噴高浪艤衝百丈城大壑千軍帳蛟宮覆絕島
鯨波赤溟漲幕府害讜言不得功罪當奇績屢見攘塞
默秉謙讓及乎雲溪役搜剔窮菁嶂遂憑死間力老謀
一摧盈封侯數則奇燕頤空殊相詎多驅除才大受足
忠忼國恥今未雪元戎况飛颺豈無幽沉士屹然安危

仗蒼茫鼓輦思駕馭必英匠

東湖雜詩 二首

百代傷心地風烟莽不收江山一弔望吳越幾春秋鴻
鴈青楓渚芙蓉白露洲霸才今寂寞何處問扁舟
禹蹟今何在蒼茫水國開山趨天目下日湧海門來笠
澤橋如帶淞江水似杯東南輸輓盡鴻鴈有餘哀

從軍行

已分沙場報國恩身經百戰滿創痕但教死去圖麟閣

不願生還入玉門

陳潛夫

一首

潛夫字元倩仁和人崇禎丙子舉人榜名朱明
後更爲除開封推官擢監察御史江東下率妻
妾投水死

絕筆

父兮生我申以嚴誨惟孝惟友曰忠與義丙子鄉舉顧
名自勵名曰孝廉庶幾無媿致身之期歲在癸未司理

開封星言視事以身許君有死無二是時兩河賊氛如
蝟衆人迴車予獨攬轡賊出河朔羣工奔避予乃渡河
擊楫而濟誓清河南以報先帝手披荆榛身禦魑魅獨
張空拳以當賊騎知有封疆九死何畏三十州邑終復
舊地維時先帝鑒予忠瘁授以巡方繡衣北莅惜也諸
姦互相牽制中樞信讒嫉予不媚聯絡要圖置之罔遂
三月撤歸可為隕涕哀哀先人一時捐棄甘旨莫承遺
書淪廢我哀方盈姦怒轉熾赫赫金吾逮予邸第園牆

幽憂寇氛猝至匍匐歸來挈家奔避航海飄零請兵于
會召募丁男三百而已衣甲糗糧皆予自備血戰江干
二十餘次糧寡兵微於事何裨疾痛呼號徒然憤恚丙
戌五月公侯師潰區區孤軍其何能濟事不可為偷生
何貴拜別吾母以及諸弟挈吾妻妾從彭咸逝成仁取
義千古如是

張國維一首

國維字其四東陽人天啓壬戌進士除番禺知

縣選授刑科給事中轉吏禮二科升太常少卿
以右僉都御史巡撫應天以工部侍郎總督河
道尋遷兵部尚書坐劾下獄崇禎十七年春起
原官督餉直浙後死于難

登采石贈諸將

月明橫槊倚層峰宵柝風飄和梵鐘舊是開平賈勇處
諸君努力此書庸

陳函輝

一首

函煇初名煒字木叔臨海人鄉舉後改今名更
字木叔號寒山崇禎甲戌進士除靖江知縣以
疾乞歸後自縊於天台雲峰寺有寒山集

譚梁生云

木叔真率自矢不假藻飾其詩十九
贈僧信手拈出使人有才多之憾

劉伶巷

有酒宜成頌知君恥獨醒回車經巷口荷鍤信丘冥死
豈人薶得言猶婦可聽閉關當日飲想像只忘形

傅冠一首

冠字元父進賢人天啓壬戌賜進士第二授編修歷侍讀中允諭德祭酒少詹事詹事掌翰林院以禮部尚書兼東閣大學士進文淵閣有寶

綸樓集

陳皇士云公詩清華典膽有唐人風

詩話傅公造格矜莊潤色閎麗去臺閣體不遠

早朝

西山爽氣接蓬萊紫殿光搖曙色開五鳳忽銜丹詔下
六龍時駕袞衣來斑聯禁地三台近樂奏鈞天萬舞迴

聖主殷憂方借箸趨陪媿乏賈生才

朱繼祚 一首

繼祚字立望莆田人萬厯己未進士改庶吉士
授編修歷中允諭德庶子少詹事禮部右侍郎
進尚書入東閣後死于難

絕命辭

嗟予生兮不辰逢慘禍兮撓身乾坤崩隕兮陸海為塵
日星掩曜兮萬象沉淪人誰無死兮鴻毛泰嶽惟其所

處兮殤延彭促旦夕畢命兮去將安之夫妻子母兮不
得相依上告蒼天兮鑒此微詞雖為齏粉兮甘之如飴
千秋萬古兮誰其予知與化俱徂兮於戲噫嘻

路振飛 一首

振飛字見白曲周人天啓乙丑進士除涇陽知
縣選授四川道御史累官漕運總督右副都御
史後入閩自縊于邵武山寺

除夕

仗劍以從戎自憐轉自喟黔驢欲噬虎病馬思追驥匡
濟術渺然進退兩無致漂泊海舟中面目亦堪恚天心
或垂憫俾全名與義寸衷百慮嬰竟夕不成寐雞鳴又
一年歲月悲空棄

譚梁生云柄國酬知之日乃作此
垂首喪氣之語足見不昧心人

揭重熙 一首

重熙字萬年臨川人崇禎丁丑以五經成進士
除福寧知州有蒿菴集

詩話洪武庚午應天鄉試長泰黃文史以作全
場五經題領解迨天啓甲子龍溪顏公茂猷亦

作五經題謄錄官惜其才而嫌其違制止謄四
子書義三篇易義四篇以入同考官祁公彪佳
取之既放榜始知為五經也崇禎甲戌會試以
知貢舉林公紆言士子有作五經全題者得俱
謄進允之於是顏公中式禮部刊會試錄特旨
命題顏公姓名於第一人李青之前蓋異典也
至十年丁丑則臨川揭公重熙十六年癸未則
嘉興譚公貞良慈谿馮公元颺武鄉趙公天麒
皆以五經舉鄉會試又萊陽宋公瑚十二年己
卯亦以五經中山東鄉試此科場盛事予在明
史館分撰文苑傳擬以顏揭譚馮數公合作一
傳既而放還不果念數公皆無負科名迷之詩
話冀後之載筆
者或有取焉

過釣臺聞晉撫蔡公訃哭之有感謝參軍遺事漫

賦

天星俄落晉陽軍路出西臺恨欲吞留得竹根如意在
化為朱鳥也招魂

曹學佺

四十二首

學佺字能始侯官人萬厯乙未進士除戶部主
事移南大理寺副轉南戶部郎中出為四川右
參政浙江按察使降廣西參議遷陝西副使留
任桂平道天啓中除名為民崇禎初復官不赴

家居殉難死人稱其節云

葉進卿云能始詩刻
意三百篇取材漢魏

下及王章其旨沉以深其節紆以婉其辭清冷
而曠絕其初為衆所譁久而世稱之周方叔
云先生力追正始警逸開元正如皎月素波清
輝自別朱鬱儀云能始天才與膽研討精深
軒輊三唐吐納漢晉貌境必似造語斯真氣峭
以潔而操調極平意鍛以鍊而擣辭若樸興會
所至神情獨往

詩話明三百年詩凡屢變洪永諸家稱極盛微
熈尚沿元習迨宣德十子一變而為晚唐成化
諸公再變而為宋弘正間三變而為盛唐嘉靖
初八才子四變而為初唐皇甫兄弟五變而為
中唐至七才子已六變矣久之公安七變而為
楊陸所趨平下竟陵八變而枯槁幽窳風雅埽

地矣獨閩粵風氣始終不易閩自十才子後惟
少谷小變而高傳之外寥寥寡和若曹能始謝
在杭徐惟和輩猶然十才子調也粵自五先生
後惟蘭汀小變而歐楨伯黎維敬區用孺輩猶
是五先生之調也能始與公安竟陵
往還唱和而能孑然不滓尤人所難

雪桂軒花開得語字

桂樹山之幽予昔擇而處顧此山中雪盈枝何楚楚去
歲花開時山川蜀道阻臨風祇相思馨香落何所暮春
歸林下棲息淹時序月明花正發露下清且滑飄飄入
人衣採摘盈筐筥料全久要義形影盍相與隱者信可

招胡媿騷人語

林守易以新舫載予同游鼓山

木蘭舟既成圖書載亦備匪資登山興疇信涉川利渚
花垂岸榮沙鳥近灣戲浪洶峽門束帆側巖影墜密林
屢移邛踈鐘遙傍寺微月出浦口澹然見游思

出郭別陳振狂將以暮潮解纜發之九龍

翩翩雙黃鵠矯矯雲中飛疾風一相失奄忽東西馳眷
此同袍友恩義無乖疑春華不久榮秋葉乃多萎念當

展行役攬涕從此辭往路何浩浩乃在瘴海涯答言別
故林與子同一時方舟夙已戒利涉臨余斯斟酌盈觴
酒各致平生私景光不相戀良駟終難追携手念已遠
出門視多歧凡影但俯形一失俱相離幸言懷明德有
如渴與饑心為道路樞安得不相知慎哉各努力勿負
歲暮期終當續古懽為樂猶未遲

峽口逢陳幼孺

出門識別苦登車愁路長峽口斷地脈南北遥相望僕

夫停其綏川廣限無梁仰視浮雲馳鴻鴈同翱翔方舟
未云涉矚險先傍徨道逢相識人乃為心所當上言長
相思下言適何方屏營周路側原野何茫茫安得盈觴
酒與子同酌嘗大義亮金石俛仰鬱中腸吾欲展此曲
列坐無高倡執手惜欲別險阻誰相將此水淺且涸離
憂方可量命不與願俱悲為參與商羨歎雲中鵲比翼
歸故鄉

夜宿迎仙館

扶策入名山幽奇恣心賞嶺路鬱且紆投林日已曛修
渚留餘光玄廬此開敞止宿無別驂烟霞集吾黨以茲
流水喧遂致衆山響明月襲其輝盈盈照帷幌幽人有
遐夢夢到羲皇上金雞遶樹號東方色微朗晨起不及
炊浩然乃長往

喜雨同茂生作

在天有常度雷鳴雨可必奈何轟然聲未見涓與滴祇
言他山暝轉為日氣逼久之旆渡河而後月離畢天澤

若王師奚為後我及禽眠枝上起蝸涎瓦間滌秋至農
可望晨興廚充食祇恐懸河傾明朝溪路澀童子報平
沙離岸已數尺

雨中過柳陳父看杏花陳父時有檇李之游

君家住近瓦官寺金陵城中最僻地向來名作杏花邨
花開始有游人至此時結伴過君家歲歲年年成故事
花枝雖不用錢買濁酒應賒為客醉客醉看花倒接羅
瀟瀟微雨踏成泥枝頭莫惜終零落明日東君渡浙西

棲霞寺

入山已深邃初地化為城古塔無全影疎鐘尚舊聲佛
龕沿嶺鑿僧舍傍泉成怪昔梁江總幽居斷送迎

得張林宗書

三秋望不見此日寄來書簡略無餘字蕭條慰索居何
嫌知我少惟恨與君疎安得秦淮水能通浪蕩渠

病中思歸

累雨山寒重今春花事稀長貧那免病百好不如歸海

樹遙閩嶠江津黯燕磯故園猶有路夢裏已多違

蕪湖

客問鳩茲地蕪湖七里長春秋無義戰吳楚混封疆
館驛臨江左僑居盡洛陽猶餘赭山石仍屬古丹陽

由鴨欄至巴丘登岳陽樓

欲問巴蛇冢先過鬪鴨欄山名天岳固湖取洞庭寬
郡邑如沙聚帆檣若樹攢平生懷曠達今日遂游觀

山路雜興

瓦井尋何處沙溝苦欲崩
斷碑猶有寺乞食即無僧
山勢開仍闔天光降遞升
平生懷勝癖遇此乃飛騰

木瀆過黃伯傳宅

已失橫塘路仍逢木瀆橋
夕陽湖正滿春草岸俱遙
餉客煩雞黍呼童灌藥苗
由來故人宅相過意偏饒

歸宗巖道中

興步行相半山迴徑轉幽
野亭漁竝席官渡馬同舟
樹古根盤道橋崩石咽流
日斜人境寂谷鳥嘯啾啾

溫陵

驛路連山路城門控海門
島船秋更急沙鳥暮能喧
落葉樵蘇逕刺桐風雨邨
素衣塵變盡聊以濯清源

荒口舖

地與施州近山開百里長
未應能弔屈只合此投荒
燒過厓俱黑春歸草尚黃
南流溪水急那更入巴鄉

登塗山絕頂

百折來峰頂三巴此地尊
層城如在水裂石即為門
澗

以高逾疾松因怪得存瑤階金翠色人世已黃昏

沙溪別東生

幾夜舟中語沙溪便有程忍將離別淚一灑合州城小
雨入江暮微陽穿樹明日歸何不得歲晚事孤征

合江舟中閏十一月晦

獨坐舟中趣無人對寂寥讀書猶不覺問路便成遙江
水屢云合離魂何處招非緣今歲閏除夕更蕭蕭

臘月之朔過江津

似此嘉平月言過險惡灘春光臨路近夜雨入舟寒酒
禁開云乍梅花惜已殘迷津如可問休作隔江看

時予
乍撤

素齋

寄信

家居閩海上寄信兩都中道里雖然隔遶迤或一通人
生皆逆旅歸念甚兒童無計堪相慰淒其落葉風

支機石

一片支機石傳來牛女津客槎何處所卜肆已生塵較

似昆池古長從漢月新每逢秋夕裏吟眺倍相親

萬厯皇帝輓歌

庚申年七月內事

薄海聞遺詔昊天號泣多勵精時匪懈法祖算還過龍
去徒留劒鳥傷不渡河前星早有屬臣庶已謳歌

泰昌皇帝輓歌

四首

龍馭升遐日封章滿御牀施行猶令旨德意自先皇沛
若江河決俄然石火先更聞哀詔到能不重傍徨
勸進箋三上騰懼遍九垓逐臣皆召用中使盡收回貨

出昭先儉心勞集相才大工須計日久矣柏梁災
罷稅不停徵邊庭歲用增金錢溢輸輓士馬飽飛騰北
闕聞天語東隅望日升那堪遽辭世倉卒治山陵
九轉神丹祕三旬帝業終春秋書法謹中外揣摩窮雨
泣將填巷攀髯或墮弓由來戮方士豈但為無功

寄關中張太守

關西遙望路漫漫泰華峰陰日夜寒長樂故宮秦輦絕
未央前殿漢鐘殘月明渭水浮三輔花發驪山繡七盤

京兆風流誰不羨時從閨閣畫眉看

送荆民部之淮陰

水色浮空下洞庭青山不斷好揚舲人過北固吳王寺
吏待南昌楚客亭別日鴈鴻俱後到望秋蒲柳已先零
但思擊筑荆卿侶長自悲歌不願醒

金陵懷古

江東列郡領丹陽鼎足三分此一方總為石頭成虎踞
不知巫峽下龍驤雲生寢廟千秋閔月照離門幾夜長

年少風流能顧曲行人猶自說周郎

雄縣

燕南趙北易西京此地猶傳避世名
河向瓦橋關外轉樓聞鼓角地中鳴
雄山警蹕留行殿亞谷降王有故城
幸沐聖明無外化宋遼何事日尋盟

武夷

丹丘遺蛻不知年方外尋真思渺然
仙橘堂空棊撤局御茶園廢竈無烟
峰頭亂插虹橋板渡口難移架壑船

忽聽玉笙聲縹緲步虛已近大羅天

大田驛訪陳伯孺時伯孺客越未歸

斜陽繫馬訪幽棲古驛門前渡小溪
鬼火漸明青嶂裏人烟猶隔翠微西
涼生遠樹鳴蟬斷秋老平沙落鴈低
何事王孫歸未得松雲蘿月思淒淒

湖間即事

仙源迢遞杳無涯拂樹齊開十月花
半壁莓苔千古色一邨雞犬幾人家
珠簾暮挂峰頭雨玉箸晴餐洞口霞

世路不堪回首望成田滄海日將斜

蜀府園中看牡丹

錦城佳麗蜀王宮春日游看別院中水自龍池分處碧

即摩訶池

花從魚血染來紅

蜀中牡丹以魚血紅為第一

平臺不到

華言龍也

林間日曲岸時迴洞口風盡道今年當大有何妨行樂
與人同

送戚山人之內黃兼簡鄧遠游明府

三月鶯聲別故山萋萋芳草照離顏春光白下無多日

夜月黃河第幾灣
置驛正當賓客盛
弄琴遙識使君閒
閨中易作刀頭夢
珍重休過博望關

送李玄白擢淮揚運長

東南財賦困征求
轉運今須第一流
際海金錢輸九塞
隔江歌吹是揚州
春風芍藥堂前宴
夜月瓊花觀裏游
舊治如舉行部處
永絃猶自韻高秋

送茅止生北征

中原兵氣亂成羣
流寇流民兩不分
背水孰能韓氏陣

撼山難動岳家軍，衝邊慣戰方良將。
側席憂居有聖君，七尺男兒三尺劒。
笑人毫楮立功勲。

松梯

身入蒼翠中，落日無人影。
步步踏松根，不覺到前嶺。
清溪朱邑宰，里人也。以荔支名，綠扶包者見餉。

三灣亭子寄山坳，夾樹人家似鳥巢。
謾說故鄉相見好，荔支先餉綠扶包。

即席贈黃姬

座客如雲待舉杯香車門外屢相催
非關故意梳妝緩自昔佳人喚夜來

彭期生 一首

期生字觀民海鹽人萬曆丙辰進士歷官江西
按察副使分巡湖西守贛州城亡自縊有弱水

山人詩集

詩話先生與楊萬諸公力保孤城死之日守備
楊大器潛收其尸瘞于萬安縣之百家村仲子
孫貽訪其遺骸未得久之鄉人胡樞知萬安縣
事一夕夢先生語曰遺骸在縣境君能歸之故

鄉幸甚會大器之友曾充臬亦以狀白樞樞資
遣之至海鹽家人詰其事皆合子女旋以血漬
遺骨俱沁人乃慟哭葬之
說者比於思歸之溫序焉

送秋

悲秋秋去轉堪悲枉復登臨賦楚辭
遠壑水殘斜照斂荒原煙冷朔風吹
天邊白鴈迷消息月下清砧感別離
蟋蟀似能占物候寂寥一夜傍牀帷

姚奇允二首

奇允字有僕錢塘人中崇禎庚辰會試癸未進

士除南海知縣後死贛州之難有草元堂詩集

秋夜

遙夜苦無寐起視明月光涼風天上來隨月入我堂披
衣步前除獨立以徬徨蟪蛄既已鳴鴻鴈亦來翔感此
時物變怨彼去日長生非金石姿安得恒壽康憂來不
可輟慷慨吟此章

遊虎邱

高丘窈窕恣幽探席展諸天坐蔚藍聽徹疎鐘歸櫂動

半塘漁火泊城南

劉同升 二首

同升字孝則吉水人祭酒應秋子崇禎丁丑賜進士第一人授修撰謫按察司知事尋復官守

贛州死

詩話劉公與楊萬諸公固守贛州或云城未陷先病卒或云城破死之傳聞異辭再考

由百花溪登玉笥山

朝看山出雲暮看雲入笥山行若無蹊恰有青童至指

點絕壁間仙臺藏勝地藤枝匪易攀屐齒猶可置日午
聞雞鳴巖椒啓金字出險坡漸平劃然人境異連峰涌
下界撲面聳層翠因過丹竈房縱覽紫微志白花雨外
明紅果林間墜晚食供芋魁晨鐺倒茶櫃坐久慵下山
踟躕想真寄塵網詎得辭幽期偶然遂

句曲山中

地肺通幽處泉流決決聞山形同一已仙籍注三君衣
潤恒燒术人來欲贈雲青童煩指點十賚拓遺文

楊廷麟

八首

廷麟字伯祥清江人宗禎卒未進士選庶吉士
授編修改職方主事軍前贊畫降調起補編修
死贛州有蕪山集

詩話伯祥慨忼淋漓特
取材未純故辭多鬱轡

懷楊進士

青青東門阪上有蘿藤結願得一心人白首無磷涅周
才慎所處不敢居明哲開戶見性情羣動齊巧拙翔鳥

安其巢離獸營彼穴萬物各為友吾生何所悅名山豈
易求耦耕效長桀

諸葛武侯祠

霸氣西南日嘗聞屢出師才為王者佐學與古人期柏
剩一孤樹桑移八百枝中原仍帝魏遺恨史臣辭

示城兒

歸舟今夕遠西望獨沾巾骨肉天涯濶山川枕席親誦
詩思有汝好學或如人以此發深省鄉書不厭頻

別葉侍御

渾水橋邊寺北田，行滕東去雨連綿。
縣桑邨古渡沙移路，茅屋人家鳥就烟。
江左衣冠悲楚澤，淮西烽火接秦川。
更聞羣盜郊原遍，欲下潯陽萬里船。

秋興

四首

北湖菱葉近漁家，烟浦荒荒雁路斜。
濕鳥立沙聞社鼓，野人當戶伺田瓜。
月明露上蒲萄蔓，夜靜風生荻蕩花。
悵望故園溪外渡，一聲橫笛冷蒹葭。

司戶祠前一騎回邊烽未舉嫚書來漢臣獨有和戎策
楚子誰稱執政才半壁但愁軍餉乏三關不覩陣雲開
最憐風雪盧龍塞換取牙門酒一杯

彊弩將軍七萬營銀鞍金甲耀晶瑩市兒果銳輕言戰
上相安危慎用兵海鳥自啼狼虎嶺妖星空照鳳凰城
河西百里無消息又道青山夜火明

漢家歲歲戍居延新築渾河北斗邊文學未諳鹽鐵論
公卿誰進度支錢高城寒聽菰蒲雨戰骨秋枯苜蓿田

壯士不聞還易水至今賓客淚潛然

萬元吉

一首

元吉字吉人南昌人天啓乙丑進士授潮州推官補歸德再改永州入為大理評事遷兵部主事出知揚州府歷太僕寺卿監軍江北死贛州

游月巖謁周元公廟

中歲不聞道汎汎逐萍梗緬懷先哲型沉憂不出頰茲來矚巖月鬼斧鑿天影尺竇洩素雲一星射瑤井物理

竟何如遐蹤忽深省元公昔幽憩萬慮悉以屏陰陽動
靜初澄心得妙領於焉瞻遺廟百世尚嚴整冥心無極
前衣露遍清冷

黎遂球

五首

遂球字美周番禺人天啓丁卯舉鄉試死贛州

之難有蓮鬚閣詩集

萬茂先云美周思以才靈學以才化識以才通語以

才妙讀其詩覺有靈光異采在目光離合間
徐巨源云萬歷五十年無詩濫于王季能于來
徐纖於鍾譚乃今獨見美周讀之如春風胎蕩
夏雲崔嵬如坐百花雜聽簫韶美人劍客翻動

左右 陳伯璣云美周近體稍傷

艷麗五言擬古諸作高于今人

詩話宋李吳月泉主社賦春日田園雜興羅公福擅場得羅一緇七筆五十矢墨五笏元季饒介之主席賦醉樵歌張仲簡擅場得黃金一餅崇禎初鄭進士超宗未第時主會賦黃牡丹詩者百人美周居第一時號黃牡丹狀元三事本太平佳話而皆出於百六之秋公福肥遯仲簡遂初美周則授命虔州三君子各自靖尤為美談美周詩不為格律所縛大都以才勝徐巨源謂太白以後一人未免過實矣

花下歌

生平不事求神仙願上東海求仙船
童男童女各三千

教之歌舞及管絃逍遙行樂二十年遂令婚配同力田
可得萬人馳九邊馬上功成銘燕然老夫鬚眉圖凌烟
結屋花國臨酒泉名儒俠客列四筵等閒詩賦人爭傳
乞得一字十萬錢

歡聞變歌

鏡破面自圓誰能破儂面天地縱反覆儂亦與歡見

懊惱歌

歡初戀儂時夜夜門前立今日歡棄儂對人不敢泣

少年行

年少傳聞十二州
報人讎盡轉多讎
經行不用變名姓
醉卧天姬賣酒樓

山中

寂寂春眠野夢多
酒醒那識夜如何
山中慣不聞雞犬
只是天明鳥便歌

梁朝鐘

三首

朝鐘字未央
廣州順德人
崇禎己卯舉人
有喻

園集

憶檀溪

半月襄城路山川滿目迷後聞都護語知已渡檀溪遙
憶歸鞭處微沙沒馬蹄叩門抱長慟忍入邵陵西

將出皖留別楊六符沈乃功唐聖俞徐譽星諸先
生時予將入襄歸粵

船傍垂楊別緒生烟含春樹鴈歸聲羣公縞帶遺吳錦
幕府青絲唱渭城幾樹烏啼趨夏口何時馬首望西京

江南江北如相憶千里高樓待月明

題畫兼寄友人

灞陵山色動秋風開遍黃花九月中每憶江南帶霜樹
夕陽疎葉渡頭紅

張家玉

三首

家玉字玄子東莞人崇禎癸未進士改庶吉士
有遙夜怨軍中遺橐

錄別和李定夫

鴛鴦戲清池兩兩常相倚
羽翼臨當乖風波中道起
相對尚難知何況萬餘里
來親去者疎毋為貴君子
予懷抱區區君諒執高誼

塗中感舊

燈下妖姬月下筵風流曾汎太湖船
如今回首神京隔腸斷西風憶往年

閨思

竹林啼鳥遍春暉何事行人尚未歸
惆悵夜來牕月白

夢魂飛不到金微

陳子壯

二首

子壯字集生南海人萬曆己未賜進士第三授
編修天啓末削籍崇禎初以原官起用歷諭德
詹事升禮部右侍郎進尚書家居殉難有雲淙
集

耕籍禮成恭紀

天子親行畝微臣相秩宗清塵傳蹕靜瑞靄出郊濃高

柳喧靈鵲華芝結袞龍普天應有兆九穀在三農

春日侍諸父泛舟桃花塢

欲作郊居即瀼西紅芳十里勝金堤不知南漢千年苑
更入東風幾曲溪負局客來籬犬吠和歌誰伴乳鶯啼
清時羣從多游好豈是秦人世外迷

陳邦彥

三首

邦彥字會斌廣州順德人貢生以兵保清遠師
潰死于難有巖野集

詩話 麓野僻居嶺南與黎美周歐子建陳喬生
以文章聲氣遙應復社卒殺身以成仁其南上
草自序云商聲曼歌慨當以慷亦各言其志也
又臨命歌云書生漫談兵時哉不我與君子誦
其詩而
悲之

南雄道中逢霍階生

病後無顏色秋深有遠行漸於鄉土隔翻遣故人驚歸
思珠江道前途白下城嶺梅殊未發貽贈若為情

重別葉公士

大雅風斯遠知音世所稀他山情獨切兩地夢俱飛楚

塞丹楓暗吳門翠岫微祇憑文賦在萬里未相違

雨夜宿吳潮泗江閣

去家五百里相過重鄉音客路樽前語江流檻外風
連三峽暗雲隱二禺深莫作登樓賦柴扉尚可尋

明詩綜卷七十七

欽定四庫全書薈要卷二萬五百五十一

集部

明詩綜卷七十八

翰林院檢討朱彝尊編

楊廷樞

三首

廷樞字維斗吳縣人崇禎庚午鄉試第一有古

柏軒詩集

徐孝若云維斗吾黨之李元禮房伯武也見義當前突怒無畏近讀其遺

詩人之云已遂成

千古之憾悲夫

靜志居詩話先生倡應社于吳中評隲五經文字張溥天如朱隗雲子主易楊彝子常顧夢麟

麟士主詩周銓簡臣周鍾介生主春秋張采受
先王啓榮惠常主禮記而先生與嘉善錢梅彥
林主書後與復社幾社合領解之後聲譽日重
門下著錄者二千人詩雖游好然如吉光孔翠
片羽皆足為珍且勝於服習竟陵派者多矣晚
歲巖居忽罹維繫其舟中遺書云廷樞幼讀聖
賢之書長懷忠孝之志為孝廉者一十五載生
世間者五十三年作士林鄉黨之規模肩綱常
名教之重任惜時命之不猶未登朝而食祿值
中原之有難遂蒙禍以捐生其年則丁亥之歲
其月則孟夏之中方隱遯於山阿忽陷身於羅
網時遭其變命付于天雖突如其來如亦已知
之久矣生平所學至此方覺快然千古為昭到
底終為不沒但因報國無能懷志未展終是人
臣未竟之事尚孤累朝所受之恩留此血衣以
俟異日舟中矢志不能盡言末書四月二十八

日復系以十絕
句文多不錄

訛聞

世塗繒繳多結廬在窮谷神悴嗟樊雉心危怯庖鹿耳
目異驚喜早暮更禍福先憂累親朋失色觀奴僕共傷
哀德鳳應賦知命鵬且當飲醇酒勿向詹尹卜

舟中

野岼官橋路已蕪寒江暮雨客舟孤烟中帆影時開落
霧裏山光半有無宿鳥驚心猶未下哀猿引臂自相呼

淒其古渡黃昏候一點漁燈起荻蘆

閨情

寂寞空閨怨夜長
征人何事未還鄉
不知牆外誰家笛
十二樓中盡斷腸

陳子龍 三十七首

子龍字人中更字卧子青浦人崇禎丁丑進士
除惠州推官丁憂服除補紹興舉廉卓天下第
一陞吏部主事改兵科給事中有白雲草廬居

湘真閣諸稿

朱雲子云卧子五古初尚漢魏中

才性故與相近七古直無高岑李頎之風軌視
長安帝京更進一格五律清婉七律格清氣老
秀亮澹逸絕句雄麗由其才大靡所不有寬然
有餘 魏楚白云五古學漢魏者大抵轉關必
在大謝唐之曲江明之北地皆是如此黃門亦
祖其說能於質閑之中無以俊秀信是雅宗七
古弘正間皆仿浣花惟青蓮學者絕少黃門起
而一振其風昔人詩笑蓉露下落楊柳月中疎
黃門近體佳境往往相似 錢瞻百云大樽當
詩學榛蕪之餘力闢正始一時宗尚遂使羣才
蔚起與弘正比隆推廓振興之功斯為極矣
繆天自云剝窮而反否極而復先徵於聲音之
道卧子當楚人衆咻之餘力追正始允矣人豪
龔衡圖云卧子定幾社六子之作目曰壬申

文選東鄉父南英千子貽書謂之蓋學前後七
子之詩而并學其文千子非之是也若詩當公
安竟陵之後雅音漸亡曼聲並作大樽力反於
正翦其榛蕪棘荆驅其狐狸瑞駱廓清之功詎
可藉口七子流派并攢譏及焉予嘗購得甌甌
洞集係先生手自施鉛自越江渡錢塘往返點
筆無虛日卷尾必以朱墨識之於吳明卿若是
矧古賢吟稿乎今人手放翁誠齋詩讀未終卷
便毀唐人為不足學
多見其不知量已

詩話王李教袁公安之派浸廣竟陵之說頓興
一時好異者詩張為幻闕中文太青倡堅偽離
奇之言致刪改三百篇之章句山陰王季重寄
譴浪笑傲之體幾不免綠衣蒼鵲之儀容如帝
釋既遠修羅築义交起搏戰日輪就暝鵬子鷲
母四野羣飛卧子張以太陰之弓射以枉夫腰

鼓百面破盡蒼蠅蟋蟀之聲其功不可泯也觀其與李宋二子選明人詩自序略云一篇之收互為諷詠一韻之疑互相推論攬其色矣必準繩以觀其體符其格矣必吟誦以求其音協其調矣必淵思以研其旨於是郊廟之詩肅以難朝廷之詩宏以亮贈答之詩溫以遠山藪之詩深以邃刺譏之詩微以顯哀悼之詩愴以深使聞其音而知其德省其辭而推其志先生之論詩知所

本矣

曜靈

六章并序

曜靈天子遇旱而憂省獄減刑雨以時降詩人

美之也

曜靈維陽杲杲麗天爰自東作火見于昏天之薦瘥蘊
隆如焚皇曰予冀方邦畿所安廢我來牟兆民孔艱
旱之始盛維塵冥冥旱既太甚百卉具零豈降自天胡
德非馨曾有是象恭曾有是讒慝曾有是詭隨曾有是
培克

爰命宗伯大雩孔明爰命徹侯于郊于宗以爾幣玉及
爾斯牲方社既周山川用享振古率育胡遘予不寧
巍巍薊丘維君宅之翼翼皇心維天繹之禮莫不展來

饗來格膳宰既徹鑪鼓既釋凡百君子勗爾無斁

皇曰司寇維刑世重世輕朕聖姦宄或愆于平悍陽驕
驕憂我黎氓乃清岸獄乃釋累囚肆赦時夏或歌且謳
倬彼燕山出雲油油終朝彌野既舒既柔既霑既優田
畷語語樂我士女以育我稷黍皇天布惠天錫純嘏

仲夏直左掖門送彞仲南歸

金塘迴素波中有雙鴛鴦託身在清禁和鳴君子旁顧
此同林鳥孤翼忽南翔生平志慷慨何事獨難忘本為

四海人豈得常相將丈夫重知己萬里同一鄉黽勉效
貞亮德輝在巖廊莫憂青蠅多和璧貴善藏執手不能
語悵矣結中腸

雜詩

六首

日夕登高臺馳目窮千里衆星燦雲間經緯誰能理神
哉玉衡運天樞無終始上有瓊瑤宮紫皇日端委我欲
乘飛鸞銜書碧雲裏聲殷塗逾遐心長情何已懷中五
色石相見徒磊磊

山椒微風發薄暮遲佳人顏陽澹林表素月生河津佇
立懷往路時宴多苦辛君家青雲樓瑤華艷當春皋蘭
亦有芳欲寄良無因歡愛豈足重要使恩誼申浮雲誠
易阻白璧終見珍

至道無相非末流乖心迹高懷苟不亮執誼日以積賢
隨貴同用愚與賤交役騰名自有階投譏豈無隙營營
棘上蠅可以携金石履純思寡尤超方鮮奇策毀譽苟
未忘顧影慚跼蹐

尚口自有窮捫舌豈我欺伊予昧機變率性不自知遇
物皆裏言當險若履夷于已固弗慎安望人保持俯仰
生平內常與悔相隨沉默苦不早壯盛忽若馳世人貴
形迹君子敬威儀臧否聖所誠南容真我師

自聞麥秀歌纏綿亂心曲四野起重陰白日一何速親
朋與我違豺虎來相逐皓皓凝河水蕭蕭落山木行吟
空自知獨立傷游目逝川何時還顏光能再燭詎惜紅
顏變所悲韶景蹙豈無帝女靈願就愚公谷

墓門有惡木，鵲巢其巔。同茲雨露潤，不與百卉妍。性
質固自殊，大造安能遷。我行適見之，三日醒未痊。利斧
雖在手，斬伐無此權。去去保芳潔，痠然思過愆。

魏楚白
云大樽

雜詩融鑄晉魏自成
一家得力又在景陽

賦得浣紗石

越紗出機中，翦向春風裏。皎若秦川雲，飄揚隨淶水。佳
人臨淺瀨，無言空徙倚。不惜紅顏勞，素絲誰為理。斂衣
入中林，澄江皓千里。青苔日夜生，沉思竟難已。

苦雨

洩雲屯層嶺密霧瀰空林南山發殷雷北郭滯愁霖紅
泉落虛壁淥水漲遙潯危條度飛鷗宿莽聚鳴禽桃英
蕩華色麥穗悲陸沉天畢騁所好屏翳日相侵徘徊華
軒下彷彿碧山岑昏墊蕩下土沉冥符道心側想零雨
篇空懷梁父吟

寓言

江東有凡鳥自名為禿鷲食魚徒滿吭毛羽終可羞其

或所立者鷗鷺必遠投何來一蒼鷹鐵翮黃金眸不作
摩天飛下集滄江流側身與鷺伍比翼相遨遊末流安
可居貴賤各自求所以老鶴心傲然橫高秋

小車行

小車班班黃塵晚夫為推婦為輓出門何所之青青者
榆療吾飢願得樂土共哺糜風吹黃蒿望見牆宇中有
主人當飼汝叩門無人室無釜蹢躅空巷淚如雨

桃源夜遇鄭超宗落第還維揚

相逢班馬鳴三月出王京秉燭黃河岸悲歌下相城風
雲雙闕暗花柳半江明突兀金臺上知君最不平

交河

烏啼征馬動曙色散滹沱海氣通三島天風靜九河沙
平邊草斷日澹塞雲多百里無烟火空村空自過

襄陽

江漢西陲重荆襄南紀雄諸侯悲峴首耆舊失隆中燧
色通秦塞妖星下楚宮不知大隄女何處舞春風

高寓公書來詢予近况予適從石齋先生築講壇
于大滌山留連竟日遂書此報之

三山迷漢使更起白雲壇環珮天風滿旌旗海日殘草
侵羣帝靜月度九霄寒惆悵乘鸞者焚香獨夜闌

廬居

行遯山河改歸來松菊荒尚餘三畝宅無復萬家旁祈
死煩宗祝偷生媿國殤但依親隴在含笑此高岡

錢塘東望有感

清溪東望大江迴立馬層厓極望哀曉日四明霞氣重
春潮三浙浪雲開禹陵風雨思王會越國山川出霸才
依舊謝公携屐處紅泉碧樹待人來

晚秋雜興

太行東出擁神京古塞秋風右北平笙鶴已辭滄海使
貂蟬初撤羽林兵清霜玉沼芙蓉苑旭日金鋪翡翠城
魚鑰時傳宣召急侍臣通籍在承明

晚渡錢塘

吳山越岫隔中流，簫鼓平明青翰舟。
萬里晴江開曉郭，千帆春草送芳洲。
桃花欲落潮先至，鶯語初聞露未收。
何事西陵常問渡，不堪重上望京樓。

送吳巒穉司李桂林

翡翠巢邊匹馬過，千盤桂嶺鬱嵯峨。
南浮灘水啼猿滿，北望君山落鴈多。
蠻語官閒能作賦，漢廷恩近憶鳴珂。
愁心獨繫張平子，欲寄琅玕奈遠何。

送張玉笥中丞擢河道少司空隨召陛見

舊京開府靜牙璋詔領河堤入未央周室保釐分郊廓
漢家底績念宣房九天星宿穿秦塞萬里梯航走冀方
為語至尊南顧日不堪重問海陵倉

錢瞻百云雲間七律多從艷入大樽

味特深厚而

詞更娟秀

吳越武肅王祠二十韻

羅平妖鳥集唐室已顛連草草羣雄事紛紛割據年斗
牛占王氣屠販出豪賢地屈孫劉勢形支江海邊爪牙
多健勇參佐集神仙本奉中原朔時分屬國天錦城開

邸第大木擁旌旃受冊三樓上歌風駟馬前自從納土
後終見舉宗遷青蓋方朝洛丹書改賜田金輿何日去
玉盃不曾還守墓新恩重荒祠舊德傳冕旒皆壯麗子
姓特繇聯晚樹騰鼉鼠虛簷響杜鵑崇功銘版碣遺恨
滿山川異代還祠廟當年八管絃竇融應貴寵張軌共
周旋錫禮何妨盛王侯豈易捐誰言脫屣便不見誓書
堅宋室諸陵在南枝更可憐

邊詞 二首

大同女兒顏如花十五學得箏琵琶莫向中宵彈一曲
清霜明月盡思家

八城亦是古遼西大纛高牙萬馬齊壯士錦衣行樂地
十年無夢到春閨

從軍行

彎弓獨上李陵臺極目燕支秋色來磧路西迴三萬里
青天遙挂白龍堆

督亢

燕南趙北起秋風
亂後斜陽沒故宮
此地輿圖原不小
能藏匕首入關中

侯岐曾 一首

岐曾字雍瞻蘇州嘉定人通政峒曾弟縣學生
援例入國子監以陳子龍事牽連執至松江遇
害門人私謚曰文節先生

望湖亭口占

俯檻即湖陰沿流望隔潯峰開三面色人雜五方音簫

鼓龍祠鬧松楸馬脊深悠然喧寂理飄泊一觀心

劉

曙
二首

曙字公旦別字揖圭長洲人崇禎癸未進士除
南昌知縣未赴居父憂坐事械至江寧死于市
有節必居橐

乙酉八月十四夜匿影農家夢楊維斗作

襖被短簷下月華靜窺帳子來入我夢顏色耿相向為
別亦已久不問別來狀互言白髮新慷慨復悽愴分袂

還跼蹐鼓枕轉惆悵緬思定交日總角氣方壯文酒多
奇懷圭璧有微尚中原今陸沉吾道未淪喪亂離憶朋
儔雞鳴不能忘乃知君與友一義相摩盪浩歌絕命辭
與子共酬唱所敦在宿昔存沒總相傍相期泰華顛千
秋訊無恙

烹悟泉因懷王克仲

相依謀已定相望意仍違清夢勞明月孤吟繞翠微分
泉甘苦共脫帽往來稀漸欲尋山徑秋風一款扉

顧咸正 五首

咸正字端木崑山人崇禎癸酉舉人除延安推官後死于難

詩話端木文康曾孫與弟咸建咸受子天達天
遠父子兄弟五人後先授命可謂不愧相門此
外江陵有孫同敞別山嘉善有子棟仲馭而家
叔祖成都府同知大定君永均與烈風中勁草
比節使後之作史者仿新唐書
宰相世系撰表亦足以生色矣

登華山

倚杖高臺萬里秋山川元氣共沉浮金神法象三千界

玉女明妝十二樓，井鉞參旗皆北拱。
濁河清渭自東流，愁看殺氣關中滿。
獨立南峰最上頭。

落葉

亭臯秋色乍淒其，葉葉枝枝悵別離。
靜院翻風人倦後，小牕敲雨夢驚時。
飄零漢殿哀蟬曲，憔悴陳宮玉樹詩。
却恐尊前歌舞罷，故園楊柳又依依。

沈山子云落葉詩
題顧氏昆友並作

而端木熨貼
特為擅場

上方巖



層層白雲堆石屋架其上鳥雀靜不喧半空人語響

糊獠愁

人心險于山平地覆車馬糊獠亦何愁愁爾登山者

新製藍布袍口號

鐵甲縱橫日綈袍寂寞時難將故鄉淚低向袖邊垂

夏完淳十一首

完淳字存古松江華亭人考功郎允彞子有玉

樊集南冠草

鍾廣漢云陳大樽選明詩存古年
纔十餘爾而宋轅文援其論詩以

作序此時已許其作後進領袖矣迨十五從軍
十七授命磨盾草檄不異老生宿儒信異稟也
詩話存古南陽知二江夏無雙束髮從軍死為
毅魄其大哀一賦足敵蘭成昔終童未聞善賦
汪跼不見能文方
之古人殆難其匹

仿古

月出西南樓流光入幽室盈盈十五女綽約好顏色素
手響金徽一彈三太息激楚變清商悲悅難自抑本以
待遠人所遇非疇昔薰風蕩羅綺卧懷行旅客夢中迷
遠道疇能辨南北飛禽習習還疑是君行跡征雲無歸

期彷徨淚盈臆

秋懷 五首

祝融避炎陸金天肅秋駕元蟬響高樹鷓鴣鳴深榭豐
草承露零朱華冒風榭蟋蟀變東榮素河轉西野自媿
蒲柳姿奄忽從物化久視多所悲疇能竟長夜

涼風何瑟瑟吹我遊子顏厯厯江上林流蟬鳴其間浮
雲西南征一去何時還駕舟凌洪波杖策窮崇山君子
不遑息小人豫以間感激在溝壑敢念徒旅艱中夜起

百憂勞人獨長歎

秋色從西來風物自淒緊金飈辭炎暉玉露戒商軫
鵲薄暮鳴幽蘭望秋隕零落在一時榮華若朝菌高從
巢父棲下與壺公飲靜觀百歲間無名以為準

耿耿秋夜光雲中覩靈匹漢陰無報章河陽有棄輓霧
帚結雲環瓊珮何厯厯佳期匪綺節妙會乃涼夕微露
鮮玉枝輕飈動雕翼餘光歛欲馳流景逝已迫黃姑九
秋期婺女三光隔彷彿靈駕回參差空夜織

愁人不能寐羅帳含月光涼風吹芙蓉習習生金塘絡
緯鳴參差瓊露凝玄霜柔條日以勁瑤草不復芳盛衰
各有時憂來浩無方玄髮忽改白使我身世忘

魏烏平
云存古

秋懷諸作非謝
非韓游衍自得

精衛

惠風蕩芳樹有鳥鳴中林尾長羽翼短銜石隨浮沉崇
山日以高滄海日以深既無凌風姿延頸振哀音辛苦
徒自力慷慨誰為心惜哉志不申道遠固難任滔滔東

逝波勞勞成古今

楊柳怨

東風初度春江曲
大堤花草參差綠
昨宵烟雨盡傷心
今日鶯花空滿目
有客扁舟迴自傷
一江春色半垂楊
始知啼鳥皆牽恨
不是征人亦斷腸

秋夜感懷

登樓迷北望
沙草沒寒汀
月湧長江白
雲連大海青
征鴻非故國
橫笛起新亭
無限悲歌意
茫茫帝子靈

送杜于皇歸郢

分手金陵道相逢倍黯然
鴛啼楊柳岬人在木蘭船
客路三千里征衣十二年
計程歸夏口明月兩圓圓

寶帶橋

連天芳草青極浦獨揚舲
歸鴈舟前落愁人夢裏聽
花光明曉霧波影動春星
欲訪靈威穴孤帆入洞庭

葉尚高 一首

尚高字而立樂清人溫州府學生

詩話而立兵後佯狂幅巾大袖行於市太守見而執之賦詩云云釋之不問丁亥二月上丁携水一杯采芹一束乘太守未釋奠哭于孔子之庭曰吾師乎吾師乎縱泰山之已頽曾林放之不如乎太守至怒繫之獄迨五月四日語獄卒曰詰朝屈大夫沉湘之日吾其死夫俾具湯沐至明自經而立詩無存市上所賦特游戲耳然亦孟榮計有功輩所當錄者

上太守

北風袖大惹寒涼
惱亂溫州刺史腸
何似蜉蝣易生死
得全楚楚好衣裳

林壑 一首

空字子楚候官人崇禎癸未進士除海寧知縣
家居死事有恥齋集

為鄢德都畫竹

所南之蘭無土恥齋之竹無根想見百千年後熒熒紙
上血痕

郭符甲 一首

符甲字輔伯晉江人崇禎癸未進士戰沒葬海

島中

詩話顧璞石懸首錢塘六月無蠅郭輔伯戰死
海濱五百人尸糜爛而四體不腐忠義之足以
感天地
萬物也

題寓園松徑

長風何處起清響落層湍忽聽晴空雨翻飛午院寒蒼
鱗移漢殿鐵幹老秦官即此開三徑徘徊盡日看

祁幼文云

春容
大雅

鄺露 二首

露宇湛若南海縣學生有嶠雅

梁芝五云湛若
上元跨馬衝南

海黃令行憶令怒拘之微吟曰騎驢適值華陰
令失馬還同塞上翁及廣州城陷猶倚柱鼓琴
為兵所刃抱琴死錦衣葉君贖之嵇侍中之衣
房公之馬宜為世所重也沈山子云湛若詩
錢金葉玉以雕琢為工

其不經意處時臻大雅

詩話湛若工諸體書學使者試士以恭寬信敏
惠發題湛若制義五比用大小篆八分行草書
于卷學使者大怪之然不罪也居恒以才略自
負見海內多事因學騎射跨馬出門衝縣令頭
躡令怒申文學使者除其名將加以桎梏乃亡
命之廣西遍尋鬼門銅柱舊蹟游于岑藍胡侯
槃五姓土司為徭女執兵符者雲韞孃書記歸
撰赤雅一篇紀其山川風土儀物及女君天姬
隊歌舞戰陣之制家蓄藏真墨蹟享帚千金素
問業於香山何閭老吾駟閭老見而愛翫不已

湛若分手脫贈既而大悔挈舟抵香山升閣老之堂欲自挂梁上閤老亟卷還之又蓄二琴一曰南風宋理宗宮中物一曰綠綺臺唐武德年製明康陵御前所彈也出入必與二琴俱廣州城破湛若抱琴死綠綺臺為老兵所得以鬻於市歸善葉錦衣解百金贖歸至今存其家詩曰嶠雅手書開雕極精楷予嘗見其駢體文亦佳

虞山謁舜祠

荒服垂衣日三苗格命年鳥耘千畝籍龍御九疑烟浦
坂征雲外蒼梧落照邊何人撫瑤瑟離恨隔湘川

采石

牛渚青天月長縣供奉祠如何今夕酒不共昔人持高
詠誰能似扁舟從所之溯洄殊未已言折楚江蘼

瞿式耜 一首

式耜字起田常熟人萬厯丙辰進士授永豐知
縣調江陵選戶科給事中以右僉都御史巡撫

廣西死于難有 缺 集

詩話瞿公生長華門屏游間之習自臨八桂盡
瘁行間既繫獄中與江陵張公同敝悲歌酬和
互作草書筆飛墨舞聯為行看子往
嘗見之于吳下所謂鼎鑊甘如飴者

遊虞帝祠次金道隱韻

祠宇蕭疎迴絕塵孤峰隨意著閒人窺雲應傍巢松鶴
破浪終同入金鱗茶椀酒鎗全部史風篙月槳一江春
予與子暇道隱扁舟泛月而歸却憐嶺嶠曾無恙便託荒巖老此身
陸冰
修云向隅之語誦之淒入肝脾

吳鍾巒 一首

鍾巒字巒穉武進人崇禎甲戌進士除長興知縣謫紹興府照磨升桂林推官

大庾道中

亂離何地度年華，老至仍憐去路賒。
共指此心猶似水，相逢多說已無家。
關山寂寞行人少，雲樹蒼黃落日斜。
逆旅挑燈愁獨寐，夢思應繞赤城霞。

李向中一首

向中字豹韋，號立齋。鍾祥人。崇禎庚辰進士。除
長興知縣，調秀水，升車駕主事，未任補職。方舟
山下，被執不屈死。

題旅舍

雲外平林東郡天邊落日西峯悲涼此夕何夕燈火黃昏店中

周世臣 一首

世臣字穎侯宜興人崇禎庚辰進士除漢川知縣以建言革職補永平府簡較升興化推官

游仙詩

圜丘列奇樹北海生神芝翡翠曜瓊圃潛鱗戲瑤池飛

泉供漱齒白石為療飢姮娥降洪響宓妃領其頤隨烟
上三島飄風凌九疑持此傲下士投簪來遠期

余鷗翔 一首

鷗翔字唱若號誕北辰溪人天啟乙丑進士除
金谿知縣調遂溪入為戶部主事歷員外郎以
布政參議守徽寧道轉山東遷浙江按察副使
調山東

聞劉念臺先生被放

皇威方震競忠愛此時心抗疏回天苦憂時去國深雲
從歸路暗日為逐臣陰慘澹春明水秋蟬寂未吟

萬曰吉

五首

曰吉字允康黃岡人崇禎庚辰進士崑山知縣
有東有堂詩四集

塔影園

半壁依青嶂千峰落翠微草堂冰雪路山鬼薜蘿衣斷
塔仍棲鵠荒岡亦采薇中原方格鬪坐卧掩柴扉

寒食

東郊朝日靜北郭暮烟遲燕不巢新幕花猶戀故枝嬾
投分肉社羞逐鬪雞兒屏絕人間事繇田弔子推

送吾無上人返廬山

萬里秋聲急青楓古渡平潯陽潮自落楚岫月孤明破
衲飢寒去芒屨雨雪行爐峯遙在望惠遠定相迎

哭艾千子

膚髮臣無恙朝廷事已非斯文將墜地先死亦知機遺

業驚殊域孤魂戀舊畿
酸風吹劍水丹旆暮雲飛

謝客

角里先生小築居蕭然衾枕半牀書
閉門覓句江湖外濯足招魂雨雪餘
卯酒動思千日醉辰瓜準擬一犂鉏
五陵公子多裘馬同學何人問草廬

朱日升 一首

日升字君旭淮安山陽人崇禎癸未進士

弔宋叟

天高木落起憂思
秋士悲歌正此時
何處靈均尋舊蹟
臨風三歎薦江離

李之椿一首

之椿字大生如皋人天啟壬戌進士除行人遷

吏部主事歷官尚寶司卿有指樹園集

朱雲子云徂徠

五律工秀起句尤用意如春曉淨江天青山入
畫船家家楊柳青車馬不曾停真不減唐人風
致

虎丘弔五人墓

亂賊兒孫擁安危呼吸爭五人能就死衆正始俱生矯
逆原非詔拳兇不為名忠魂今尚在時映夕霞明

項禹揆一首

禹揆字子昆秀水縣學生與李之椿同遇害

和定齋陳子閉關

聞道牆東客翛然避竹陰泥封清濁酒箋輟短長吟沮
溺耕焉耦求羊徑轉深看君同臭味可許獨幽尋

睦本一首

本字允立丹陽人明永子縣學生坐事死有務
菴集

和袁景文白燕詩

瑤海春深舊壘非水雲漠漠望依稀雪中曳縷飄紅去
月上窺簾傳粉歸莫以處堂怡玉羽豈將巢幕語烏衣
故宮別殿今何向冷落梨花影共飛

張煌言 二首

煌言字玄著鄞人崇禎壬午舉人

詩話文信國至燕元世祖命具供帳如上賓既
戮于柴市臨朝歎曰文丞相好男子不肯為吾
用殺之誠可惜也興朝之主待亡國之臣其恕
若是聞公就執制府趙清獻公待之以禮慰勸
再三卒以不屈含笑受刑殮而葬之雷峰之右
至今有包麥飯而祭者清獻之寬仁足以頌矣

樅陽謠 二首

八尺風帆百丈牽樅陽湖裏去如烟江南米價秋來長
喜殺桐槽賣稻船

沿湖下網蕩湖船網內纖鱗錦樣鮮燈火湖光兒女笑
魚秧種得不須田

黃周星 二首

周星字九烟上元人育於湘潭周氏中崇禎庚辰進士除戶部主事疏請復姓晚居湖州有芻

狗齋集

詩話九烟晚變名曰黃人字曰略似又號圃菴又曰汰沃主人又曰笑蒼道人布衣素冠寒暑不易人有一言不合輒嫚罵嘗賦詩云高山流水詩千軸明月清風酒一船借問阿誰堪作伴美人才子與神仙年七十忽感愴于懷仰天歎曰嘻而今不可以死乎自撰墓志作解脫吟十二章與妻孥訣取酒縱飲盡一斗大醉自沉于水時五月五日也又仁和陳叟繼新居於禾晚

節納石于懷中赴龍淵寺門潭中
死均不失為申徒狄徐衍一流

天台

勝蹟天台路移情入窅冥亂泉秋後寺絕壁古時亭
櫺葉岼多濕蓮花峯更青白雲吾語汝且向石梁停

秋日與杜子過高座寺登雨花臺

被髮何時下大荒河山舉目共淒涼客來古寺談秋雨
天為幽人駐夕陽去國屈原終婞直無家李白只徉狂
百年多少憑高淚每到西風灑幾行

錢梅一首

梅字彥林嘉善人崇禎癸酉中順天鄉試以薦

除職方主事進郎中坐事死於市有白門集

俞右

吉云彥林貴公子性好結客復社未舉之先吳有應社彥林實倡之平生與卧子交最深卒同其禍仲子不識女婿夏存古咸有神童之目存古年十七慷慨就死與婦翁白首同歸尤世所難也

詩話吾鄉科第之盛數嘉善錢氏撫軍相國二房聯華接武相國有仲馭撫軍有彥林後先以死勤事賢子弟固自難得

七夕獄中作

對泣南冠度綺宵
江鄉千里客愁遙
雙星若識人間事
也定淒然罷鵲橋

徐爾穀一首

爾穀字似之嘉興人國子監生坐事被逮死白
門有畫水草堂詩稿

贈顏先生

萋萋芳草望中迷
落盡棠梨水拍堤
誰向扁舟憐別客

金
五
日
人
二
卷七十八
白雲相送板橋西

明詩綜卷七十八



總校官庶吉士

臣張能照

校對官檢討

臣蕭九成

膳錄監生

臣周元

膳錄監生

臣劉天蒼